

主人佳政自是其餘事侍天上玉皇之香案紬書卽趣于遄  
歸某倦飛作癡幽討成僻摧墮病鶴出樊籠而未能摩挲曉  
猿幸蕙帳之無恙何上恩之優渥畀近郡之便安圍棋而燒  
煥衣知故人之尚爾折梅而寄驛使媿芳訊之先焉敢拜重  
勤願言多謝

筠州到任謝周右相啓

天上仙山旣收朝蹟江西道院復畀使藩未容卒歲之淹已  
趣班春之早伏念某山林野性筆硯苦心作賦非工敢自許  
同時之司馬草元何用焉知有後世之子雲偶當聖賢相逢  
之辰墮在英俊並游之列紛十年其奔奏耿再命以來歸或  
甚之以繞月之烏或怵之以遇風之鷁彼意非惡此愚不移  
居亡幾何又復妄發顧於婚嫁之役咄咄逼人乞收江海之